

OTVORENO PISMO UDRUŽENJA, FONDACIJA I OSTALIH ORGANIZACIJA CIVILNOG DRUŠTVA U BOSNI I HERCEGOVINI

VLASTIMA BIH;
MEĐUNARODNOJ ZAJEDNICI;
SVIMA KOJI UČESTVUJU U PREGOVORIMA O BUDUĆNOSTI BOSNE I HERCEGOVINE

Svjesni smo teške političke situacije u našoj državi u posljednjih nekoliko mjeseci. U ovoj krizi je neizvjesno kako će izgledati uređenje države, kakvi su stavovi i interesi pregovarača, a kakvi međunarodne zajednice te zašto je degradirana uloga civilnog društva u izgradnji demokratske Bosne i Hercegovine.

Trenutna društveno-politička situacija je u prvi plan stavila pitanja koja ne odražavaju stvarne potrebe i brige stanovništva, te se ovakvim pristupom doprinosi degradaciji demokratije, vladavine prava i osnovnih društvenih vrijednosti.

Građani i građanke BiH žive u teškim uslovima, suočeni sa siromaštvom, pandemijom, poplavama, požarima, pravnom nesigurnošću, galopirajućom inflacijom, nepravdom. Kriminal i korupcija su najveća pošast bh. društva, i jedan od ključnih faktora zbog kojih vladajuće elite podižu tenzije, želeći obezbijediti naklonost biračkog tijela za osvajanje vlasti na narednim izborima, kako bi se nastavila daljnja enormna pljačka javnih sredstava. Uz to, EU nema više u fokusu Zapadni Balkan pa je usporen i proces usklađivanja zakonske regulative u skladu s pravnom stečevinom EU. Posljedica je da građani i građanke nemaju više nadu da je promjena na bolje u ovoj zemlji uopšte moguća, zbog čega je već nekoliko godina u toku migracija stanovništva.

Podizanje nacionalnih i političkih tenzija je u svakom trenutku nepotrebno građanima i građankama, a u ovako teškoj ekonomskoj situaciji je apsolutno neprihvatljivo.

Zbog toga ZAHTIJEVAMO

- Da se ODMAH u sve razgovore i pregovore oko sudbine naše zemlje obavezno uključe predstavnici/predstavnice koordinacijskih tijela civilnog društva sa najmanje 50.000 uključenih građana i građanki
- Da se razgovori i pregovori odvijaju isključivo u okviru bh. institucija

ZALAŽEMO SE za demokratsku Bosnu i Hercegovinu, vladavinu prava, jednaka prava svih građana/građanki i naroda, za punu afirmaciju nacionalnih i vjerskih sloboda.

Zajednički kontakt dolepotpisanih udruženja, fondacija i ostalih organizacija civilnog društva je inicijativaOCD@gmail.com.